



## SAOPĆENJE ZA JAVNOST

# **Nakon pokušaja ubistva policajca Produžen pritvor osumnjičenom S.M.**

(Brčko, 4.7.2024. godine)

Postupajući po prijedlogu Tužilaštva Brčko distrikta BiH, Osnovni sud produžio je pritvor S. M. (33)\*, osumnjičenom da je šestog juna u Brčkom pucanjem iz pištolja pokušao lišiti života policijskog službenika J. T. Osumnjičenom za pokušaj ubistva, pritvor je produžen za dodatnih mjesec dana, usljed opasnosti da bi mogao ponoviti ili dovršiti pokušano krivično djelo za koje se može izreći kazna zatvora tri godine ili teža kazna.

Tužilaštvo i Policija Brčko distrikta BiH intenzivno sprovode istragu protiv S. M. zbog sumnje da je 6. juna oko 02,30 časova u ulici Mostarska, ispred ugostiteljskog objekta *Belvedere*, pucanjem iz pištolja pokušao lišiti života J. T. Kako se navodi u naredbi o sprovođenju istrage, nakon što su prethodnog dana u večernjim satima zajedno sjedili u navedenom objektu, njih dvojica su se odvezli na brčanski carinski terminal gdje su pred prijateljem E. T. započeli verbalni sukob. Nakon toga, E. T. je osumnjičenog povezao do objekta *Belvedere*, dok ih je oštećeni pratio i sustigao na parking u tog objekta gdje su nastavili verbalni sukob. Zatim je osumnjičeni, dok se J. T. nalazio u automobilu, iz svog vozila uzeo pištolj i, svjestan da ga može lišiti života, iz neposredne blizine ispalio sedam hitaca prema njemu. Kako se zaključuje u naredbi, on je oštećenog pogodio u lijevu nadlakticu, nanijevši mu tešku tjelesnu povredu, i na više mjesta ošteti vozilo u kojem se nalazio J. T, nakon čega se s trećim licem odvezao s lica mjesta.

Osumnjičeni je ubrzo lociran i uhapšen, a nakon zadržavanja i kriminalističke obrade u Policiji, sproveden je u prostorije Tužilaštva. Tokom tužilačkog zadržavanja, S.M. je ispitan u svojstvu osumnjičenog, nakon čega je Tužilaštvo podnijelo prijedlog sudu da mu odredi pritvor, uz obrazloženje da bi osumnjičeni boravkom na slobodi mogao ponoviti ili dovršiti pokušano krivično djelo za koje se može izreći kazna zatvora tri godine ili teža kazna. Prihvativši tužilački prijedlog u cijelosti, Osnovni sud Brčko distrikta odredio je pritvor S. M. u trajanju od jednog mjeseca, počev od momenta njegovog hapšenja. Prije isteka jednomjesečnog pritvora, Tužilaštvo je predložilo da se osumnjičenom produži trajanje ove mjere cijeneći da još postoje okolnosti zbog kojih mu je pritvor prvobitno i određen. Prihvativši i ovaj prijedlog, sud je produžio pritvor osumnjičenom za dodatnih mjesec dana, počev od šestog jula. U međuvremenu, Tužilaštvo i Policija nastavljaju intenzivnu istragu usmjerenu na dokazivanje krivičnog djela ubistva, u pokušaju (iz člana 163 stav 1 Krivičnog zakona Brčko distrikta BiH) i krivičnog djela neovlaštene nabavke i držanja oružja.

\*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.

**GLAVNI TUŽILAC**

**ZEKERIJA MUJKANOVIĆ**